

des zugethan soll werden/allein das vberflüssige darvon genossen/
 dann solches ihme nicht füget/sondern alleine/was ihme am nech-
 sten ist an der Natur. Nuhn will ich dir/ O allerliebster/ auflegen
 die rede der Philosophen/ vnd die verdunckelten Wort der weisen/
 mit Parabolen vnd gleichnussen verdeckt/ darbey du abnehmen
 kanst/ daß ich ihre der Philosophen Reden verstehe/ vnd daß sie die
 warheit fürgeben haben/ bestetigen könnest. So ist nuhn das erste/
 so die Philosophi nennen eine Solution/welches der Kunst einen
 grund fasset/ daher spricht Maria/ vereinige Gummi mit Gummi/
 mit rechtem Heurath/ vnd mache sie als lauffent Wasser. Rosinus
 Philosophus spricht/ so ihr nicht verwandelt das leiblich in das
 ohnleiblich/ so arbeitet ihr vergeblich. Item Paramonides als er
 von diser Solution saget in Turba, etliche so dise Solution hören/
 vermeinen sie geschehen ausser ihres Leibes/ mit dem sie vereinigt
 sind/ vnd ist worden ein bestandhaftig Corpus, dann der Philo-
 sophen Solution ist nicht eine frolockung des Wassers halben/
 sondern daß die Corpora in Wasser soluiert oder verendert wer-
 den. Darauß sie anfenglichen geschaffen/ als nemblichen in mer-
 curium, gleich wie das Eys in fließend Wasser/ als es zuvor war
 gewesen/ da sihe durch die Gnad Gottes ein Element/welches ist dß
 Wasser/ vnd seines Leibes verenderung/ in ein flüssig Wasser.

Das ander Wort ist/ daß auß dem Wasser wirdt Erden/ durch
 die sanffte Decoction/ offtmals widerholet/ biß eine schwere vber
 sich gehet/ dan also saget Auicen. in titulo de humorib. die wirk-
 liche hize in dem feuchten Corpus gebieret erstlich eine schwere/
 wie zusehen ist im Kalch den der gemeine Mann machet. Darumb
 Menaldes spricht/ ich heisse die nachkömbling machen Leib/ so nit
 Leib durch die Dissolution vnd ohnleibliche Leib/ durch die sanffte
 Decoction/ in welcher wol zuuerhüten/ daß der Spiritus nicht im
 Rauch dahin fahre vnd verschwinde durch das groß Fewr. Daher
 spricht Maria/ bewahr ihn vnd hute dich daß nichts im Rauch
 hingange/ vnd soll die maß der Hize solches Fewrs seyn/ als die hize
 der Sonnen/ des Monats Iulij: Auff daß auß langwirigem koch-
 chen das Wasser dicke/ vnd ein schwarze Erden werde/ also hastu
 ein anders Element/ welches ist Erden.

Das